



Aqqalu C. Jerimiassen
Medlem af Inatsisartut, Atassut
inatsisartut@ina.alla.gl

Angallannermut atatillugu, aammalu akunnittarfeqarnikkut mittarfiillu nutaat illutaanni pisinnaasat pillugit § 37 naapertorlugu apeqquteqaammut 2025-129-mut akissut

Dato: 15-08-2025
Sagsnr.: 2025 - 16195
ID. nr.: 98972019

Asasara Aqqalu C. Jerimiassen

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Inatsisartut suleriaasianni § 37 naapertorlugu angallannermut atatillugu, aammalu akunnittarfeqarnikkut mittarfiillu nutaat illutaanni pisinnaasat pillugit Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik..

Apeqqut 1: Nuna tamakkerlugu angallannikkut eqaallisaanissaq eqqarsaatigalugu Naalakkersuisut mittarfissuit tamakkerlutik atuutilinnginnerini unnuisarfeqarnikkut namminersortut peqatigalugit inerisaanissanut qanoq pilersaaruteqarpat?

Akissut:

Akissuteqarnissamut Inuussutissarsiornermut, Aatsitassanut, Nukissiutitut, Inatsisit Atortinneqarnerannut Naligiissitaanermullu Naalakkersuisoqarfik akissuteqartinneqarpoq:

"Naalakkersuisoqarfimmiit Ilulissani Nuummilu najukkani namminersortut akunnittarfiornissaannut arlalinnik pilersaaruteqartoqartoq ilisimaneqarpoq, tassanilu annertunerusumik sukumiisumillu paasisaqarnissamut kommunit pilersaarusiornermut immikkoortortaqaarfii innersuunneqarput.

Naalakkersuisoqarfimmiit illoqarfinni taaneqartuni unnuisarfeqarnermik ineriartortitsinissamut suliniutinik aallartitsinissaq tunngavissaqartutut isigineqanngilaq, akunnittarfiornermi suliat siuariarfioersut sumiiffinni suliaqartoqartoq ersarissumik takuneqarsinnaammat."

Tassunga tunngatillugu ilassutigineqarsinnaavoq, tamatuma peqatigisaanik nuna tamakkerlugu paasissutissaasivik, GoGreenland-imik atserneqartoq, soqutigisaqartunit assigiinngitsunit paasissutissanik katersuiffiusoq, tamannalu tunngavigalugu ilaatigut ukiuni tulluuttuni unnuisarfiit pillugit missiliukkanik saqqummiuffiusussaq suliaralugu ingerlanneqarmat.

Apequt 2: Nuummi mittarfissuup illutaa nutaaq tattorliuuffiusaqaaq, Ilulissaniittussarlu suli mikinerusussaalluni, tassunga tunngatillugu naalakkersuisut allannguutaasinnaasumik pitsanngoriaataasinnaasumillu pilersaaruteqarpat angallannikkut avannaani angallanneq equsoortikkumanagu?

Akissut:


Akissuteqarnissamut Greenland Airports A/S akissuteqartinneqarpoq:

"Greenland Airports-imiit Kalaallit Nunaanni angalasut, mittarfiit qulimiguulinnuunnit mittarfiit arlaannilluunniit atuigaluarunik pitsaasunik misigisaqarnissaannik qulakkeerinissaq aallunneqartorujussuuvog. Nuummi Ilulissanilu mittarfiit illutaasa nalunaaquttap akunneranut inuit aalajangersimasunik amerlassusillit sullissisinnaanissaat tunngavigalugu ilusiligaapput. Tamatumani mittarfinnik ataasiakkaanik atuinermut naatsorsuutigisat tunngavigineqarput. Ilulissani mittarfiup illutaa nalunaaquttap ataatsip ingerlanerani inuit 300-t tikittarnissaannut aamma inuit 300-t aallartarnissaannut naleqquttussanngorlugu ilusiligaavoq.

Ilulissani mittarfiup illutaa Nuummi mittarfiup illutaanit mikinerusunngorlugu ilusileneqarpoq. Greenland Airports-ip Ilulissani angalariaasissap Nuummi angalariaatsimit allaanerungaatsiarnissaanik naatsorsuutigisaqarnera tamatumunnga tunngavigineqarpoq. Timmisartuutileqatigiiffik Ilulissat mittarfiannut timmisartuussisartussat timmisartunik, Nuummur atorineqartunik allaanerusunik atuisarnissaat naatsorsuutigineqarpoq. Timmisartuutileqatigiiffiit naatsorsuutigaat, timmisartut atorineqartussat "narrowbody fly"-inik taaguuteqassasut. Timmisartut taamaattut nalinginnaasumik 180-it tikillugit ilaasoqartarput. Ilulissat Nuup ullumi atorineqarneratut "angallannikkut akunniffittut" atorineqassasog Greenland Airports-imit naatsorsuutigineqanngilaq. Aamma oqaatigineqassaaq, Ilulissanut timmisartuussineq aallartippat ullumikkut Nuummur angallannerup ilaa ingerlaannartumik Ilulissanut nuuttussaammat, taamaalillunilu Nuummi mittarfiup illutaani misigisartakkat pitsaanerulertussaallutik. Taamaattumik Greenland Airports maannarpiaq Nuummi imaluunniit Ilulissani mittarfiit illutaasa ilusaannik allannguinnissamik pilersaaruteqanngilaq."

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Aqqaluq B. Egede